

## **Kay ang Tuba Nagabahal kon Maagahan**

Ni Jhio Jan A. Navarro

Ay, diri sa uma, wala may nagapati  
Nga ang ilimnon nga makahulubog,  
Mas naganamit kon mas lawig nga taguon.

Wala diri bino, wala diri serbesa  
Nga kon bukuton, patam-ison sang dinag-on.

Kon madugayan nga ang botilya  
Indi masungsungan, ang basi nagalad-ang.  
Ang tuba nagabahal kon maagahan.

Nga angay lamang tungod kami  
Indi mga haciendero nga makahulat  
Sang hayahay samtang nagautaw-utaw  
Sa kalipay, sa katawhay, sa bugnaw  
Sang mga hulot kag lum-ok nga ulunan.

Ang amon dugo kag bahulay  
Nga ginatígi sang tagiti sang adlaw  
Nagahangyo nga gilayon  
Mapahamuok sa pagtulog antes  
Matuluan sang ulan,  
Mangin Santermo, mag-ibwal.